

ALAHADY faha-4 PAKA - TAONA B



Bernava 2013

"Izaho no mpiandry ondry tsara,

sady mahalala ny ahy Aho no fantatry ny Ahy" (Lk 24, 35-48)

Ry Kristianina havana, mbola ao anatin'ny fankalazana ny Paka tanteraka isika ary raha mahatsikaritra isika mba hivelomantsika izany hafaliana lavorary vokatry ny fiadanana atolotry ny Paka amintsika izany ka hitoerantsika ao amin'i Jesoa sy hitoeran'i Jesoa tafatsangan-ko velona ao amintsika dia atolotry ny Eglisy isaky ny Alahady ny toetran'i Jesoa ho fankaherezana antsika hiroso lalindalina kokoa eo anivon'ny fiainana hizara ny hafalian'ny Paka. Efa nampahatsiahivintsika teto io tamin'ny Alahady lasa. Alahadin'ny Paka mibanjina an'l Jesoa nandresy ny ratsy rehetra nitsangan-ko velona. Izy no Aina velona amintsika zanak'Andriamanitra ka mahatonga antsika ho EOV. Alahady faha-2, I Jesoa Famindrampon'Andriamanitra velona. Alahady faha-3, Jesoa miara-belona amintsika mizara ny manta sy ny masaka. Tsy matoatoa sanatria I Jesoa nitsangan-ko velona fa olona velona miaraka misakafo amintsika. Alahady faha-4, Jesoa Mpiandry ondry tsara mahalala antsika ondriny ; mamelona sy mitsimbina.

Izany no mahatonga antsika sy ny Eglisy eran-tany hibanjina manokana momba ny fiantsoan'Andriamanitra satria na pretra na voatokana na lahika dia mifototra amin'ny batemy ka zary EOV MISIONERA VITA BATEMY KA IRAHINA HO TABERNAKLA VELONA. Mitafy

an'I Kristy ka antsoina Kristiainina. Matetika anefa raha miresaka Fiantsoan'Andriamanitra dia tsy afenina fa ny tonga ao an-tsaintsika voalohany dia ny pretra sy ny relijiozy. Tsy mahagaga izany satria antsoin'Andriamanitra izy ireo handray fahasoavana manokana ahafahan'izy ireo hanahaka ny fiainan'i Jesoa amin'ny alalan'ny voady sy ny fanokanan-tena ary indrindra amin'ny fanamasinana ho pretra izany hoe mandray sakramentan'ny filaharana. Mivavaka isika mba hanahaka an'i Jesoa tokoa izy ireo, mivavaka isika mba hanana pretra masina, pretra mitoetra tanteraka ao amin'i Jesoa sy itoeran'i Jesoa ka mamokatra ny fiainany sy ho vavolombelona manahaka an'i Kristy tokoa izy ireo. Enga anie ireo voatokana relijiozy lehilahy sy vehivavy hanahaka ny fitiavan'i Jesoa ka hanolon-tena amin'ny fanehoampitiavana amin'ny toerana rehetra anirahana azy.

Tsarovy ry Kristianina havana fa raha mivavaka ho an'ny fiantsoan'Andriamanitra isika dia mivavaka koa ho an'izay vita batemy rehetra araka ny voalazantsika teo mba ho Apôstôly satria irak'i Kristy eo anivon'izao tontolo izao ho fanasina sy fahazavana ho an'ireo manodidina, ho EOV MISIONERA VITA BATEMY IRAHINA HO TABERNAKLA VELONA.

Izany rehetra izany no hivavahantsika amin'izao Alahady faha-4 ny Paka izay ankalazantsika an'i Jesoa mpiandry ondry tsara izao. Andeha àry ho banjinintsika ireo toetry ny Mpiandry Ondry Tsara.

Antsoina mpiandry ondry tsara i Jesoa satria mahafo y ny ainy, Izy ihany no manambara an'izany ary anisan'ny toetra takina izany fahafoizan-tena izany. Tsy manao kobaka am-bava I Jesoa fa hivelomany izay lazainy. Nanasa ny tongotry ny mpianatra izy ary nanolotra ny aina teo ambony ny hazofijaliana. Raha te-hanorina Eglisy Fianakaviam-ben'Andriamanitra, ilay antsoin'I Papa hoe "FRATELLI TUTTI" mira "OLO ARAIKY ISIKA JIABY" dia tsy maintsy mahafo y. Ao anatin'ny fahafoizana sy fanompoana no ahafahantsika mifanasoa sy mifampitsimbina ary mikatsaka ny soa iombonana. Mampahatsiahy antsika ny tenin'I Papa raha miresaka an'I Md Josefa izy : "tsy sefo no katsahin'izao tontolo izao fa Ray hikarakara sy hikolokolo azy tahaka an'I Md Josefa nikarakara ny Fianakaviana Masina tao Nazareta....". Tamin'ny alalan'ny asa fitoriana, fampianaranana, tamin'ny fanomezana sakafo ny vahoaka marobe nanaraka azy tany an'efitra, tamin'ny famantarana maro samihafa no nentin'i Jesoa manambara ny fahafoizana ary faratam-pony amin'izany ny fahafoizany ny aina teo ambony hazofijaliana.

Azo lazaina fa anjaram-piaintantsika Kristianina ny fahafoizana. Raha atao teny hafa tena "identité"ntsika ny fahafoizana. Nambaran'i Jesoa ny mifanohitra amin'izay dia ny mpiandry ondry ratsy vao mahita ny amboadie dia mamela ny ondriny ka mandeha amin'ny toerankafa. Aoka isika ho tahaka an'i Jesoa, Izy no mpiandry ondry tsara, aoka isika tsy hamela ny ondrintsika fa hahafo y tena ho azy ireo.

Manontany tena isika ankehitriny aiza amin'ireo ambaran'i Jesoa amin'ny evanjely no misy antsika, ilay mpiandry ondry tsara ve sa mpiandry ondry ratsy, sao dia ray na renimpianakaviana tsy miaro na mikolokolo ny zanaka isika fa indrindra amin'izao andro sarotra izao ? sao isika pretra na relijiozy, eveka manararaotra mitady ho an'ny tenany samirery

mihinana ny ondry matavy ? Tsara ho dinihina izany amin'izao andro fankalazana ny mpiandry ondry tsara izao, miantso antsika i Jesoa hanahaka Azy, miantso antsika ny Eglisy. Sao àry mamela ny hafa eo ambany maso atao am-pihimamba, hosehosena ny maha-izy azy, tsy mijery ny rariny fa faly amin'ny fahafinaretana isan-karazany ka hadino ny maha-mpiandry ondry tsara.

Isika rehetra no tsy maintsy mandini-tena ka mihavao amin'izao Paka izao hiroso amin'ny "changement radical de comportement", amin'ny fiovam-penitra mahery vaika eo amin'ny fomba fainana sy amin'ny fitondran-tena. Manana modely isika izay vao nankalazaintsika tsy ela ny fetiny dia I Lucien Botovasoa izay nahafoy sy nanolotra ny ainy. Azo lazaina fa lahika votom-pinoana, nanahaka an'i Jesoa mpiandry ondry tsara i Lucien Botovasoa, tsy nilaozany ny ondriny na dia afaka nandositra aza izy fa niverina nanangona azy ireo, niara-nivavaka ho an'ny fandriam-pahalemena sy fifankatiavana. Tsy natahotra izy nanolotra ny ainy ho fanavotana ny maro.

Aoka isika hivelona ny maha-mpiandry ondry tsara ka hikarakara azy ireo avy. Samy manana ny ondry karakarainy isika tsirairay avy na ny Papa, na ny Eveka, na ny pretra, na ny religiozy, na ny mpanabe, ny mpampianatra, ny manam-pahefana isan-tokony fa indrindra ny Mpitondra eo amin'ny firenena sy amin'ny faritra, indrindra amin'izao krizin'ny KORONTANAVIRUS izao. Tandremo sao sanatria hanararaotra izay ondry apetraka Andriamanitra karakaraintsika fa izay ny atao "mercenaire" Mpiandry Ondry ratsy.

Misy kriteria nambaran'i Jesoa koa ahafahantsika mahafantatra ny Mpiandry Ondry ankoatry ny ny fahafoizan-tena dia tsy inona fa ny fahalalana ny ondriny araka ny voalazany hoe : "*sady mahalala ny ondriko aho no fantan'ny ondriko*". Izany no maha mpiandry ondry tsara satria misy fifandraisana lalina eo amin'ny mpiandry ondry sy ny ondry, mifankafantatra tsara ka na ny feo aza dia fantatra. Ny teny hoe mahalala ao amin'ny Baiboly dia fananana fifandraisana lalina, tsy hoe mahafantatra an-kandrina izany fa miditra amin'ny tena fainana, fanaovana traikefa ny fitiavana misy. I Jesoa dia mahalala antsika tsirairay ka izany no maha mpiandry ondry tsara Azy. Aoka isika amin'ny andraikitra ananantsika hahalala ny ondrintsika, vokatry ny fifandraisana tsara izany ka takina amintsika rehetra mpiandry ondry tsara na ray sy renim-pianakaviana izy na religiozy na pretra na eveka na olona manam-pahefana.

Ny fahatelo dia ny fiezahana hampivondrona ireo ondry ao anatin'ny vala tokana. Izany hoe mpampiombona sy mpampihavana tahaka an'i Jesoa. Ny nanolorany ny ainy dia ny fahafantarany antsika ka ny tanjony dia ho olo araiky ao Aminy isika. Io ny tanjona tian'I Papa hisongadina ao amin'ny Ansiklika haha-“ OLO ARAIKY ISIKA JIABY” ho “FRATELLI TUTTI”.

Izany koa ny fainan'i Lucien Botovasoa, nahalala tsara ny olona tao Vohipeno izy no sadym fantatr'izy ireo koa. Rabefihavanana no niantsoana azy. Lalana tsy maintsy harahintsika koa izany fa indrindra isika manana andraikitra eo amin'ny fiaraha-monina, ny ray sy renim-pianakaviana, ny mpampianatra, ny mpanabe, ny mpitondra.

Hantsika koa ny hafatr'I Papa raha nanome an'I Md Josefa ho modely izy. Mila Baba, mila Ray, mila FON-DRAY izao tontolo izao (Patris Corde). Baba, Ray aman-dreny hampiombona ka hifanasoa, sy hifampitsimbina ny rehetra.

Manamafy izany ny voalaza ao amin'ny vakiteny voalohany : matoa mpiandry ondry tsara ilay voalazan'ny Mpaminany ary tanteraka tokoa satria ny anaran'i Jesoa no mampiombona antsika ka hahazoantsika ny famonjena ary efa natolony antsika rahateo ny ainy. Io no fahefana mampiavaka an'i Jesoa, fahefana mitondra famonjena fa tsy fahefana mamoritra na manapotika na manongana araky ny hevitr'izao tontolo izao. Ny fahefan'izao tontolo izao dia ho entina manongana satria entanin'ny fitiavan-tena, ho entina hahazoana harena hanapotehana ny hafa. Tsy fahefana tahaka izany ny an'i Jesoa fa nahafoy ny ainy Izy, tò teny Izy ary mampiombona antsika sy hahazoantsika ny tena hasambarana. Mananatra antsika i Md Joany ao amin'ny vakiteny faharoa hanahaka an'i Jesoa ka hahita azy araka ny tena toetrany. Matoa isika manaraka an'i Jesoa dia mba hahalala ny tena toetrany ary manampy antsika Izy ka hahalala ny toetra maha zanak'Andriamanitra antsika sy hiaina an'izany amin'ny fiainantsika andavanandro, ho tena mpiandry ondry tsara tokoa isika.

Ry Jesoa Kristy zokinay ô, lanao tokoa no tena mpiandry ondry tsara ka mahalala anay ary izany ny fanantenana sy antoka ho anay amin'ity fiaianana ity. Mangataka aminao izahay ampio ireo manara-dia anao akaiky dia ny Papa, ny Eveka, ny Pretra. Omeo ny tena finoana tokoa izahay ka hitoetra tanteraka ao Aminao sy hitoeranao ka hamokatra be amin'ny fahafoiza-tena eo amin'ny fiaianay andavanandro. Enga anie hahafoy tokoa izahay ka ho zary EOV MISIONERA VITA BATEMY IRAHINA HANORINA ETA TRANOBEN'ANDRIAMANITRA HO FIANAKAVIAM-BEN'ANDRIAMANITRA .

Toy izany koa ireo mpitondra rehetra ara-nofo fa indrindra ireo tompom-pahefana mba ho ilay fahefana tò teny ka hitarika ny vahoaka amin'ny vala tokana.

Ireo mpitondra anay anie hotsilovin'ny Fanahinao Masina ka hahay hikatsaka mandrakariva ny soa iombonana. Ampio izahay mba hahery fo tahaka an'i Piera sy Joany ary ireo Apôstôly, tahaka an'i Lucien Botovasoa mba tsy hatahotra izahay fa hanohy ny asan'i Jesoa mpiandry ondry tsara amin'ny toerana misy anay ka ho fanasina sy fahazavana izahay sy ho taranaka mpanorina tokoa, manorina Eglisy trano sy Eglisy olona velona fa indrindra amin'izao vanimpotoana atrehina izao, krizy maro lafy vokatr'ity KORONATANAVIRUS ity. Masina Maria Reninay mivavaha ho anay mba ho TABERNAKLA VELONA tahaka anao izahay. Md Josefa mivavaha mba samy hanana FON-DRAY tokoa izahay rehetra fa indrindra ny Raimpianakaviana sy izay mpitondra manana fahefana. Amen

Mompera Arseveka Mgr Benjamin Ramaroson